

Ballata Pe Ghjuvan-Natale

V'aghju à cuntà, amichi, una storieta vera,
Corciu Ghjuvan-Natà, chì lu m' amicu era,
A ghjente li carcava d'offese,
Scaccanava, li trattava di tontu di u paese.

Ripigliu:

Spassighjava cun volpe, muvra, ricciu è cignale,
Chì li prestava tanna, sere di tempurale.
Stàtem' à sente, 'ssa strufetta hè di u locale,
Stàtem' à sente, ballata pè Ghjuvan-Natale.

Ellu parlava spessu cun l'acelli in furesta,
Avia sempre in faccia un sorrisu di festa,
Chjamava lu versu cù e surgente,
Viuletta, filetta, sò le so cunfidente.

Ripigliu:

Curria cù i falchi, l'ape è le farfalle,
Dice chì qualchì fata l'hà datu duie ale...
Stàtem' à sente, mai ùn chjinerà le spalle,
Stàtem' à sente, ballata pè Ghjuvan-Natale.

Tandu, dìtemi puru, quale hè u più scimitu
D'un latu un citadinu, da l'altru, ellu, rimitu,
A notte, mentre chì a ghjente dorme,
Ellu va cavalcà sott'e stelle l'unicorne.

Ripigliu:

Se sentite una voce, passendu in fiuminale
Cù lu ventu cantà un qualchì madricale,
Stàtel' à sente, lu so fiatu hè immurtale,
Stàtel' à sente, ghjè a ballata di Ghjuvan-Natale.